

Servetschs centrals RTR –
da la contabilitad fin al café

pagina 3

«Amur senza fin» cun Ca-
thomas, Jemmi, Schnoz e
Zindel

pagina 9

Patricia Scarpatetti – mam-
ma per 36 uffants

pagina 23

Tge mutta «No-Billag» per il
Grischun?

pagina 25

Hoppa, hoppa heia, mies bab ò nom Andreia, mia mamm'ò nom Barbletta

Il giat Miro e la famiglia Babulin: la purschida per ils pitschens sin rtr.ch/uffants crescha ad in crescher.

(dj) La serie da 26 filmins cun il giat Miro e ses amis Bea, Kroki, Lele, Riki e Dino è vegnida realisada en tut ils idioms. Ils cumpogns giogan ensemens, fan in grond viadi, baje-gian instruments, festiveschan in anniversari e traffitgan anc bler auter.

Tumasch la locomotiva, chanzuns, versets ed in lexicon Era «Tumasch la locomotiva» fa part da la purschida sin rtr.ch/uffants. En 40 episodas vegn raquintada l'istorgia da Tumasch, la pitschna locomotiva a vapur. Sin la pagina chattan ils geniturs pli-navant in lexicon, filmins explicativs dal Minisguard sco era chan-

zuns, versets e poesias che RTR ha rimnà.

La famiglia Babulin

«Amez la val, amez il vitg, amez in curtin è ina chasa violetta. Ella ha ina lautga in pau torta ed in chamin. Ed exact en questa chasa abitescha la famiglia Babulin. Il bab Arno, la mamma Claudia, ils dus uffants Nic e Luisa, il chaun Lupo ed il giat Brutus.» Enfin la fin da l'onn vegn realisada in'emprima episoda da la famiglia Babulin. Las istorgias sa basan sin las istorginas curtas dal cudesch realisà da la Lia Rumantscha en collavuraziun cun Flurina Plouda ed Yvonne Gienal. Las figuras surve-



La famiglia Babulin fa part da kidsfits, il program da famiglia da la Lia Rumantscha.

gnan vita uschia ch'ils uffants pon era guardar las aventuras da la famiglia en furma audiovisuala. L'onn proxim suondan lura quater ulteriuras episodas, era quel-

las en tut ils idioms. La purschida vegn cumplettada cuntuadament. Dapli per uffants e famiglias sin: rtr.ch/uffants.

Editorial

Jau sun renconuschaivel e losch

Sco muntagnard sai jau quant impurtant ch'il spiert da cuminanza e la solidaritat èn en Svizra. Era per la SRG SSR èn quai valurs centrales. Ella vegn finanziada da la cuminanza solidarica svizra. Da cuminanza procurain nus che tut las regiuns da la Svizra vegnan prove-didas cun programs da radio e tele-

visiun en lur lingua. Nus essan francads en la societad civila cun las societads purtadras ed independents da la politica e da l'economia. Quai vala era per RTR che represchenta en spezial la societad civila da la Rumantschia e che dat a quella ina vusch ed ina fatscha en la Svizra – per la Svizra. Cun prioritat ha RTR ina incum-bensa schurnalistic-editoriala. Ma



RTR fa anc dapli. RTR è in ferm motor da la lingua e cultura rumantscha. RTR fa crea-zioni linguisticas per il-lustrar e documentar la vita da mintgadi en la te-levisiun, al radio ed on-line. RTR dat impuls, è garant per il mantegniment ed il svilup da la musica, da l'art figurativ e da bleras outras spartas da la cultura en il territori rumantsch. RTR è dentant

er in post da documentaziun dal passà e dal preschent da la Svizra rumantscha. Perquai che minoritads e la Svizra multifara èn impur-tantas per mai, sun jau renconuschaivel e losch da questas presta-zions. L'iniziativa No Billag stat per in'altra Svizra. L'iniziativa è radica-la e sa metta cunter il patratg da la solidaritat – ed uschia era cunter la Rumantschia.

Jean-Michel Cina,
president SRG SSR

In nov team al timun da la SRG SSR

L'entschatta d'october ha Gilles Marchand, il nov directur da la SRG SSR, preschentà las prioritads da sia laver e nominà Ladina Heimgartner, la directura da RTR, sco sia substituta.

(ssr/rtr) Gilles Marchand (54) ha suttastritgà sia pronteza ad in dialog avert e constructiv – tant cun las ulteriuras medias sco era cun il public. «Ensemes cun mias collegas e mes collegas en las regiuns ed a Berna vegn jau a m'engaschar cumplainamain per l'avegnir dal service public, perquai che jau sun persvadi da l'importanza da quel per noss pajais.»

Perquai vul Gilles Marchand era porscher vinavant programs excellents en tut las quatter linguas uffizialas, segirar la professionalitat e l'independenza da las redacziuns, promover la midada digitala en la SSR, mantegnair il contact cun il public giuven e cuntinuar ad investir en la cultura.

Tschintg projects da cooperaziun concrets

Il directur general ha era intunà quant difficila che la situaziun per las chasas da medias privatas saja en vista al tempo da la digitalizazion. Perquai valia quai ussa da promover la cooperaziun. Quai vul Gilles Marchand far cun tschintg projects concrets:

- surlaschar a medias privatas videos da novitads per lur diever
- proponer a radios privats da surpigilar novitads da radio
- metter a disposiziun la tecnolo-



Il president da la SRG SSR cun sia nova squadra. Da sanestra: Jean-Michel Cina, Ladina Heimgartner, Gilles Marchand e Bakel Walden.

gia da la SRG SSR per ina plattafurma da cuntegns averta

- promover cooperaziuns per l'innovaziun da medias
- lantschar in sistem da mesiraziun per online.

Il team da Marchand

Ensemes cun la nominaziun sco substituta ha il directur general

era surdà a Ladina Heimgartner (37) il dossier «medias e societad»:

«La finamira sto esser quella d'adempilir anc meglier l'incumbensa che la SRG SSR ha survegnì da la societad. En il temp dad oz vul quai era dir che nus vegnin pli averts e pli dinamics, che nus tschertgain pli ferm il dialog cun la societad e tadlain attentamain.»

En sia laver survegn la direcziun da la SRG SSR sostegn da Bakel Walden (42), dapi il 2012 manader da la strategia da program da SRF. El surpiglia la nova partiziun «Svilup e purschida» che unescha la coordinaziun da program, la transfurmaziun digitala, la perscrutaziun dal martgà ed il barat internazional.

DAVENTAI COLLAVURATURA DA RTR

SIN RTR.CH/PLAZZAS PUDAIS VUS

ABUNAR LAS PLAZZAS LIBRAS DA RTR.



Servetschs centrals RTR – da la contabilitad fin al café

Sch'insatgi dumonda nua che jau laveria, di jau savens «en l'administraziun da RTR». Correct fiss dentant «en la partizun servetschs centrals», quai pretenda dentant adina anc explicaziuns supplementaras.

Insatgi che lavura en l'administraziun è per il pli occupà cun lavurs da biro: l'entir di davant il computer, scriver e leger e-mails, far calculaziuns, preparar documents e participar da la damaun fin la saira ad ina seduta suenter l'autra. Gea, era quai èn sa chapescha lavurs che vegnan fatgas en nossa partizun. Per enumerar tut las grondas e pitschnas incumbensas da la partizun servetschs centrals RTR na tanscha il spazi che stat a disposiziun en questa ediziun dals Accents dentant betg.

Finanzas e personal

Las incumbensas las pli enconuscentas da la partizun èn bain quellas che pertutgan las resursas umanas e la contabilitad. Quai è per exemplu la responsabladad per il preventiv, la contabilitad, l'administraziun da contracts ed il controlling. Ed anc pli concret è quai la responsabladad per in preventiv da 25 miu. francs e per l'admini-

straziun dals fatgs da persunal da 170 collavuraturas e collavurturs.

D'importanza èn er ils contacts da la partizun servetschs centrals cun la direcziun generala a Berna. En spezial il schef da la partizun ed il responsabel resursas umanas e contabilitad fan part da differents gremis naziunals che s'inscuntran regularmain.

Logistica

Tar la partizun servetschs centrals tutgan era las collavuraturas responsablas per il retschaviment e per la cafetaria. Ch'il retschaviment fa bler dapli che dar il bainvegni e l'adia persunal ubain al telefon sa mintgin che ha ina giada duvrà agid u infurmaziuns en chasa RTR. Er il bainstar da collavurturs stat a cor a la partizun: preparar e nettegiar locals sco era surpigliar la responsabladad per il bainstar corporal durant dietas, sedutas da team e dis da scolaziun.

E betg d'embrlidar l'organisaziun ed administraziun dal material da biro ch'ins dovra per la laveria da mintgadi en tut las partizuns da nossa chasa da medias.

Strategia e planisaziun

Il referent da la partizun sa fatschenta tranter auter cun la strategia da l'interpresa e cun la planisaziun annuala da las differentas partizuns. Igl ha num rimnar las infurmaziuns e metter quellas sin palpiti avant ch'ils documents vegnan sancziunads en ils differents gremis da RTR e da la SRG SSR. Ultra da quai tutgan er il controlling en connex cun il management da ristgs, cun dumondas da la segirtad e dal reporting per mauns da la direcziun generala da la SRG SSR tar sias incumbensas. E quatter giadas l'onn coordinescha e planisescha el era l'ediziun dals Accents.

Erwin Ardüser,
referent servetschs centrals

SERVETSCHS CENTRALS



BEAT LOZZA

SCHEF SERVETSCHS CENTRALS



DANIEL WASESCHA

RESPONSABEL RESURSAS UMANAS E CONTABILITAD



Vanessa Erni
Margreth Janjöri
Clorinda Tgetgel



SELD A CAEGN

RESPONSABLA LOGISTICA



Emilia Barros
Maia Just
Renata Peterhans
Lea Spinatsch



ERWIN ARDÜSER

REFERENT SERVETSCHS CENTRALS

Marisa Demont, Mustér
Anton Derungs, Glion
Aurelia Gaspar, Savognin
Heidi Manatschal, Samedan
Madlaina Pult, Scuol

NETTEGIAMENT STUDIOS REGIONALS

Politica, sport e cultura live sin rtr.ch

(vs) Era l'onn proxim cuntinuescha RTR cun sia producziun da livestreams che vegnan emess sin rtr.ch e sin HbbTV. Intgins temas e termins èn già enconuschten:

fin da schaner

teater a Ftan, Krock&co da Friedrich Glauser

8-2-2018

til da bagordas da gievgia grassa a Domat

10-2-2018

hockey regiunal EHC San Murezzan – CdH Engiadina

3-3-2018

Surseva Jam a Breil

matg

podiums da discussiun elecziuns regenza grischuna

Ulteriurs livestreams vegnan planisads en il decurs da l'onn. Tematicas e termins vegnan communitgads cuntinuadament sin ils chanals da RTR ed en La Quotidiana.

Top 5 RTR – Mias emissiuns preferidas

Selina Huonder ha 18 onns ed è oriunda da Segnas. Ella ha cumenzà l'avust 2015 l'emprendissadi commercial tar RTR. Questas tematicas han plaschì bain ad ella en il program da RTR:

Open Air Lumnezia 2017

Damai che jau hai gî la pussaivladad da far la stad in viadi da lingua en l'Irlanda, hai jau manchentà l'Open Air Lumnezia 2017. Ma il team da Battaporta ha procurà che jau hai pudi perseguitar ils highlights da quest festival da musica. Ils curts films e las fotografias sin Instagram e Facebook èn stads fitg simpaticas ed han plaschì bain a mai. La concurrenz per ils ultims bigliets che RTR ha fatg è stada divertenta ed il bel è stà che omadus teams han la fin finala survegnì bigliets.

Dapli sin Instagram e Facebook via ils accounts da Battaporta.

«Audas?» Chiara live tar RTR Adina puspè han ins udi e legì l'ultim temp da la giuvna Chiara Jacomet da Rabius e da sia band «CHIARA».



A mai ha l'intervista en il studio dal Radio Rumantsch cun Georgina Janki plaschì il meglier. Ins ha tadlà l'intervista cun gust e survegnì intginas impressiuns da sia via musicala, da sia band e da sias chanzuns. Il discurs è stà fitg infurmativ ed interessant.

Dapli sin rtr.ch «Live tar RTR» dals 13 da settember 2017.

A la sumbriva dal Tambora

Ils Cuntrasts che raquintan dal vulcan en l'Indonesia e da la fom en val Tujetsch han commovì mai. Ils matlets mussan fitg bain co che quai era quella giada. Quai che ha plaschì

fitg bain è ch'i n'è betg in film documentar normal, nua che persunas discurran dad in tema. Quest film cuntegna era scenas giugadas. Dapli sin rtr.ch «Cuntrasts» dals 22 d'october 2017.

Dal Magic Wood a l'Action Wood

Per schabegòt hai jau chattà dacurt sin rtr.ch quest film dals «Cuntrasts». L'istorgia dal Magic Wood en la Val Ferrera ha interessà e fascinà mai. E quai era perquai ch'in da mes hobis e raiver e boulidar. Dapli sin Play RTR ubain rtr.ch «Cuntrasts» dals 2 da november 2014.

Dal lontan en il Grischun

La seria è stada simpatica ed interessanta. Ils films curts han infurmà bain, pertge precis che quella persona ha bandunà sia patria ed è vegnida en Svizra. Era bun è stà il fatg ch'ins ha emprais in zic dapli d'ina autra cultura.

Dapli sin rtr.ch «Dal lontan en il Grischun».

Impressum

editura: Radiotelevisiun Svizra
Rumantscha, 7000 Cuira

gremi editorial: Ladina Heimgartner (lh), Erwin Ardüser (ea), Johann Clopath (jc), Tamara Deflorin (td)

gremi redacziunal: Patrick Alig (pa), Erwin Ardüser (ea), Claudia Cathomen (cc), Johann Clopath (jc), Tamara Deflorin (td), Armin Gruber (ag), Ladina Heimgartner (lh), Daniel Wasescha (dw)

per questa ediziun han era collavurà: Flurina Badel, Alice Bertogg (ab), Prisca Bigiel (pb), Jean-Michel Cina, Silvana Derungs, Guadench Dazzi (gd), Bertilla Giossi (bg), Sergio Guetg (sg), Selina Huonder, Diana Jörg (dj), Alexi Monn, Paula Nay, Valentin Schmed (vs), René Spescha (rs), David Spinnler (ds), David Truttmann (dt), Flavio Tuor (ft), Roger Tuor, Beni Vigne (bv)

grafica e cumposiziun: Johann Clopath

correctorat: Lia Rumantscha

stampa: Gammeter Druck und Verlag AG

datas da publicaziun: 4 giadas l'onn (1-3 / 1-6 / 1-9 / 1-12)

ediziun: 3'200 exemplars

contact: accents@rtr.ch,
Radiotelevisiun Svizra
Rumantscha,
Via da Masans 2, 7000 Cuira
tel. 081 255 75 75

Gugent resguardain nus Voss giavischs per ulteriurs abuna-ments, midadas d'adressa, e.u.v.

era sin: rtr.ch/accents

Climate Partner

klimaneutral

Druck | ID 11223-1711-1001

**CAFÉ RUMANTSCH
CUN LA DIRECTURA
LADINA HEIMGARTNER**

12-12-2017, 19:30

USTARIA BERGMÜHLE A MASAGN

Dapli sin rtr.ch

Lia Rumantscha

RTR Radiotelevisiun Svizra Rumantscha

al puls dal Grischun

Cordiala gratulaziun a Pius Paulin

L'entschatta da novembre èsi stà precis 30 onns dapi che Pius Paulin ha già ses emprim di da laver tar RTR.

(rtr) Sia carriera professiunala tar RTR ha el cumenzà il 1. da novembre 1987 sco tecnicist dal tun. L'entschatta dal 1993 surpiglia Pius Paulin lura la responsabladad per ils quatter collavuraturi da la partizun tecnica e daventa commember da la direcziun RTR. Dapi lura è la tecnologia sa sviluppada en in tempo rasant. Cun l'entira chasa da medias è era creschi il dumber da collavuraturi e collavuraturi da la partizun tecnica sin oz 27 persunas. Nossa interpresa è, era cun l'engaschament da Pius Paulin, ida tras

nundit blers process da svilup e transfurmaziun che han midà tant las incumbensas e sfidas sco era la cultura da manaschi da l'interpresa. Ses engaschament per la chaussa – e per RTR – enconuscha l'entira SRG SSR. Grazia ad in spiert innovativ e cumbattiv ha el pudì iniziari e realisar baininqual project che ha lura baud u tard era chattà l'acceptanza en outras unitads d'interpresa. Quest spiert innovativ è già vegnì documentà en il rapport annual 1994 ch'enumerescha ils merits dal nov responsabel da la tecnica cun



ziuns P+T ed informatica dil RR stada d'avantatg. II RR ei staus l'emprema unitad d'interpresa dalla SSR che ha nezegiau las forzas da P+T ed informatica per projects novs.» L'experiencie rimnada durant tut quels onns ha Pius Paulin era pudì trair a niz il mument che RTR ha pudi realisar cun la planisaziun e construcziun dal nov center da medias ses pli grond project tecnic. Stimà Pius, grazia fitg per tes engaschament passiunà en favur da RTR, en chasa sco er en ils gremis naziunals da la SRG SSR. Ti procuras che la pli pitschna unitad d'interpresa na vegn betg a la curta e po savens era far laver da pionier.

ils pleuds: «Sco dapertut survegn era tier il RR l'informatica adina dapli impurtonza. Ord quei motiv ei la buna collaboraziun dallas parti-

Tgi vegn – tgi mida



Yvonne Simmen

(*1990) ha cumenzà l'october 2017 sco redactura dal newsdesk. Ella vegn da Rueun, ha fatg il gimnasi claustral a Mustér, lura gi diversas occupaziuns e studegià a l'Universität da Turitg. Ella ha in master of arts cun il rom principal da musicologia.



Flurin Clalüna (*1998)

è returnà tar RTR. Dapi il november 2017 lavura el tar ils reporters e fa la scolaziun schurnalistica a la MAZ.



Flavio Huonder

(*1966) mida sin l'entschatta da schaner 2018 cumplettamain en la squadra da D+A.



Claudia Cathomen

(*1968) lavura dapi il november 2017 sco referenta program e mantegna dasperas la part da la dispo program.



Ursin Lechmann

(*1984) ha midà funcziun e lavura dapi il november 2017 sco producent Radio Rumantsch.



Donat Caduff (*1982)

cumenza l'entschatta da schaner 2018 sco redactur per il Magazin da cultura, Vita & cretta e Marella. El è creschi si a Cumbel/Valgronda e Sagogn. El ha fatg il seminari da scolasts a Cuira e lura il bachelor of arts, graphic design a la scol'auta d'art Rietveld ad Amsterdam. El è disponent da las Viafiers federalas svizras a Turitg cun pensum parzial. Dasperas ha el divers projects sco independent en

il sectur grafica, fotografia e disegn.



Martina Caprez

(*1976) terminescha per la fin da schaner 2018 sia lavur sco redactura dal newsdesk e resta anc cun in pensum pitschen per far scolaziun en chasa RTR.



Flurina Huonder

(*1989) mida sin l'entschatta da schaner 2018 tar la biblioteca da l'ETH a Turitg e resta cun in pensum pitschen vinvant tar D+A da RTR.



Madlaina Niggli

(*1990) cumenza l'entschatta da favrer 2018 sco referendaria communicaziun e marketing. Ella vegn da Segl Maria, ha fatg la matura a l'Accademia Engiadina a Samedan ed il

bachelor of arts en sciensa da medias ed italianistica a l'Universitat da Basilea. Durant il studi ha ella lavurà sco redactura tar l'Engadiner Post/Posta Ladina. Silsuenter ha ella lavurà tar l'Uffizi federal da traffic ed actualmain lavura ella sco referendaria communicaziun e reclamas tar l'Uffizi da construcziun bassa dal chantun Grischun.



Aron Monn (*2002)

cumenza l'avust 2018 l'empredissadi d'informatica. El vegn da Sedrun.



Milena Vincenz

(*2002) cumenza l'avust 2018 l'empredissadi commercial. Ella vegn da Savognin.

Cordiala gratulaziun e bun'entschatta.

Giubileums da fatschenta

december 2017

Anna Caprez – 10 onns

schaner 2018

Michel Decurtins – 10 onns
Gaby Degonda – 10 onns
Astrid Alexandre – 10 onns
Maia Just – 15 onns
Guadench Dazzi – 15 onns

Partenzas

Fin da november 2017

Eva Gaudenz

Cordiala gratulaziun e grazia fitg per la lavur e la fidaivladad.



A l'ur dal Festival da Jazz 2017

(rtr) Durant il Festival da Jazz San Murezzan, ch'è vegnì organisà il fannadur passà per la 10avla giada, ha RTR fatg numerusas registraziuns per ses agen diever, ma era per autras unitads d'interpresa da la SRG SSR. A l'ur dal festival è Gioni Alig, tecnicist da tun RTR, lura era s'offri tut spontanamain da registrar l'intervista che Harry Jones, il schurnalista da la plattaforma «LondonJazzNews», ha fatg cun l'inschigner da tun Martin Pearson (sin la foto a sanestra). Quel lavura savens per radio SRF ed è per exemplu era stà responsabel per registraziuns da portatuns da Keith Jarrett. Dapli sin londonjazznews.com

Cordiala gratulaziun a Bertilla Giossi

(rtr) Il film «Crappa, laina ed ossa» da Bertilla Giossi ha survegnì ina menziun speziala dal «Internationales Archäologie-Film-Medien-Festival» che ha gî lieu quest october per la 12avla giada a Brandenburg en Germania. La giuria scriva: «Der Film ist ein gutes Beispiel für Heimat-Archäologie und archäologische Denkmalpflege im besten Sinne. Er zeigt die faszinierende, alltägliche archäologische



Arbeit mit erfrischender Selbstironie».

RTR ha realisà il film «Crappa, laina ed ossa» en collauraziun cun il Servetsch archeologic dal Grischun che festivescha il 2017 ses 50avel anniversari. Guardar il film sur da chats spectaculars, scuertas commuventantas ed in flop en l'istorgia da l'archeologia grischuna pon ins sin Play RTR ubain sin rtr.ch

Da l'unifurma militara ad ina stgaffa da fulars

In film dals Cuntrasts va a la tschertga dals pass da carriera da la presidenta actuala da la regenza Barbara Janom Steiner.

(rtr) Da la giuvna advocata nunenconuschenta è l'Engiadinaisa Barbara Janom Steiner sa sviluppada aifer paucs onns ad ina da las personalitads las pli profiladas en la politica grischuna. Il 1995, cun 32 onns, vegn Barbara Janom a Cuira e sveglia prest l'interess da las partidas, e cunquai ch'ella na vul betg che la Svizra daventia commembra da l'UE èsi cler ch'ella chatta la via en la

PPS. Uschia cumenza la carriera politica da la donna che ha bain ertà il sez dad Eveline Widmer-Schlumpf en la regenza grischuna, ma ch'è durant ses temp d'uffizi era creschida or da la sumbriva da sia antecesura.

Tge rolla ch'il militar ha gî per Barbara Janom Steiner, tge connex ch'ella ha cun ina cobra e tge ch'i dat da raquintar da la stgaffa da fulars,

A la tschertga

dals pass da carriera da Barbara Janom Steiner

Il film dals Cuntrasts è da vesair sonda, ils 30, e dumengia, ils 31 da december, a las 17:25 sin SRF1.

L'emissiun chatt'ins lura era sin Play RTR e rtr.ch

quai mussa la redactura Isabelle Jaeger en in film dals Cuntrasts.



Barbara Janom Steiner, la presidenta da la regenza grischuna, sa senta bain en la glisch dals reflecturs.

Chadaina da Fortuna: Ladina Heimgartner remetta il presidi

Cun la fin da l'onn remetta la directura da RTR ses uffizi sco presidenta da la Chadaina da Fortuna ch'ella ha occupà dapi l'entschatta 2015.

(rtr) En il rom da la reorganisaziun dal team da direcziun da la SRG SSR ha Gilles Marchand numnà Ladina Heimgartner sco sia substituta. En quest mument ha ella remess ses mandat sco presidenta da la Chadaina da Fortuna (CF) ch'ella surdat la fin da l'onn a Pascal Crittin, il directur dad RTS.

Ladina Heimgartner, Vus essas directura d'ina chasa da medias ed enfin la fin da l'onn presidenta da la CF che gida en cas da crisas umanitaras en Svizra ed a l'exterior. Co sa cunfan questas duas incumbensas?

Bain! Per l'ina èn la SSR e la Chadaina da Fortuna dapi l'emprim di d'existenza da l'organisaziun colliadas stregamain. Naschida è la fundaziun numnadama in or d'ina emissiun dal Radio Lausanne da quella giada. Per l'autra sa basan omaduas organisaziuns sin in fundament da valurs solid: qualitat, fidanza, etica e.u.v. Tant la SSR sco era la Chadaina èn confruntadas cun la sfida da mantegnair e tgrir quella basa ed en il medem mument da transportar las valurs en il mund digital.

Il team da la CF sa cumpona dal directur Tony Burgenner e da var 20 collavuraturas e collavuraturs. Il cussegl da fundaziun che Vus presidiais sa cumpona da represchentants da las ovras umanitaras e da la SRG SSR. Co èn regladis las incumbensas e lavurs tranter l'organ operativ e quel strategic?

La cumposiziun dal cussegl da fundaziun garantescha già in barat interessant: la SSR d'ina vart, las

ovras umanitaras da l'autra vart. Las discussiuns tranter questas duas gruppas en cumbinazion cun l'operativa eran effectivamain adina puspè fitg animadas. Quest process è interessant, perquai ch'ins sto adina puspè chattar soluziuns creativas e cumpromiss: ina dretga organisaziun svizra pia!

Vus avais presidià la CF ils ultims trais onns. Tgeninas èn stadas durant quest temp las pli grondas sfidas?

La laver na sa lascha betg planisar. D'in mument a l'auter poi dar ina catastrofa e lura èsi da reagir spert. Era las entradas finanzialas dependan da las catastrofas e da las collectas respectivas. Planisar sur plirs onns è fitg difficil. Ins è pia adina puspè dumandà spontanain en las pli differentas situaziuns.

Dal punct da vista umanitar è la furma da crisas ina gronda sfida. Crisas durablas – per exemplu conflicts armads che mainan a moviments da fugitivs – datti adina dapli. Tuttina èsi bler pli difficil da ramassar raps per talas crisas che per catastrofas da la natira.

En il center da l'interess stat la CF adina il mument ch'ella sa drizza en il rom dals dis da rinnada a la publicidad. Quai fa ella cun appels per rinnar daners per mitigiar las consequenzas d'ina catastrofa ubain d'ina situaziun d'urgenza concreta. Dapi il 2015 è quai capità trais giadas, numnadama per gidar ils umans suenter il terratrembel en il Nepal, per gidar fugitivs sin l'entir mund e per mi-



La fin d'avust èn Ladina Heimgartner e Tony Burgenner, directur da la Chadaina da Fortuna, sa rendids en Val Bregaglia per sa laschar infurmars dal stab da crisa davart la situaziun suenter la bova a Bondo.

tigiar la fomaz en l'Africa. Co avis Vus mintgamai vivì queste dis da rinnada?

Durant quels dis van veritables unidas da solidaritat tras la Svizra. Quai èn eveniments che muventan. Interessant era che las centralas da telefon paran er en temps da l'internet da restar fitg dumandadas: la glieud telefonescha per far ina donaziun, ma era per cundivider in patratg u in'istorgia. Era sch'il context da la rinnada è trist, la gronda solidaritat svizra durant quels dis fa adina puspè gronda impressiun e plaschair.

En Vossa funcziun sco presidenta da la CF essas Vus ultimamain era stada en la Val Bregaglia, a Bondo, per discutar cun ils responsabels davart las pussaivladads d'agid per ils pertugads da las bovas e malauras. È quai stada ina situaziun speziala per Vus da pudair s'engaschar en il Grischun?

Ina catastrofa va a cor, independentamain dal lieu, nua ch'ella capita. Sco presidenta n'esi era betg mia funcziun da traier decisiuns operativas: per quai datti spezialists e criteris cleris. Dentant: naturalmain hai jau persequità cun attenziun speziala ils eveniments a Bondo, era perquai che RTR ha rapportà intensivamain da tut quai ch'è capità en Bregaglia.

La CF è vegnida fundada l'onn 1946, pia avant passa 70 onns. È ella insumma anc confirma al temp, u du mandà auter: pertge dovri la CF er en il futur?

Er oz datti anc bleras personas che dovràn agid – a l'exterior sco er en Svizra. Solidaritat è ina valur profundamain svizra. Perquai: in'organisaziun che vegn da mobilisar la solidaritat en favur da personas en crisas umanitaras dovri uss ed en futur.

Sin il viv! Ils Impuls van sin turnea

Per il giubileum da 25 onns Impuls preschenta RTR ina turnea da lectura tras il Grischun ed a Turitg.

Era grazia a l'emissiun Impuls è la scena da litteratura rumantscha oz viva e vasta sco anc mai. Perquai envida RTR ensemens cun la Lia Rumantscha da festivar il giubileum da 25 onns Impuls cun la turnea da lectura: «Sin il viv!»

Durant l'onn 2018 èn planisadas set lecturas, e quai là, nua ch'ils Impuls vegnan tadlads, en ils lieus dal mintgadi da las audituras e dals auditurs da radio; pia en stivas e stallas, en lavuratoris ed ierts. Mintgamaï quatter auturas ed auturs prelegian novischems impuls, ma texts ch'en vegnids scruts già avant onns apostea per la rubrica dal Radio Rumantsch.

Impuls è cult!

Dapi l'onn 1993 emetta RTR di per di l'emissiun Impuls; in patratg per cumenzar il di da las audituras e dals auditurs da radio. Istorgias vairas u bain inventadas; texts leghers, poetics, trists, experimentalis, meditatifs, critics e savens cun ina nota persunala. Cun ils onns èn ils Impuls quasi daventads in'atgna furma litterara rumantscha e la rubrica ha survegnì ina muntada impurtanta en la promozion da la litteratura rumantscha.

Durant ils ultims 25 onns èn vegnids scruts, legids ed emess passa 9'000 impuls. Actualmain scrivan scripturas e scripturas etablis sco per exempli Leo Tuor, Rut Plouda u Dumenic Andry ils impuls. Ma la rubri-



Da fim nair, tatgaders u vatgas senza cornas: l'emissiun Impuls emetta di per di in'istorgia u in essai curt scrit e legì da differentAs auturAs rumantschAs.

ca dal Radio Rumantsch è ina platta-furma bainvesida era per scripturas che fan gist in pass impurtant en lur carriera litterara sco Romana Ganzoni, Gianna Olinda Cadonau u Chattrina Josty u scripturas main enconuschencts sco Dominique Dosch, Stina Hendry u Carlo Beer.

Las redacturas da l'emissiun Impuls, fin l'onn 2016 era quai Rita Uffer, han adina era gi ina funcziun da tschertgatalents. Ed uschia han pliras auturas e plirs auturs fatg lur emprim pass litterar cun scriver impuls. Ad auters ha la rubrica pussibilità da publitgar cuntuadament e d'uschia tgirar e perfecziunar il

scrivere. Varsaquants impuls u texts elavurads dals Impuls èn vegnids publitgads en gasettas, revistas u ediziuns. Adina puspè vegnan era translatads texts dad autres linguas, uschia hai dà quest onn impuls en collavuraziun cun la scripture tudestga Elke Heidenreich e per l'onn proxim datti ina seria d'impuls da Jens Nielsen.

Sin il viv!

L'emprima lectura da la turnea «Sin il viv!» ha lieu dumengia, ils 28 da schaner 2018, a las 16:00, en la Garascha Oberalp a Sedrun. Susi Rothmund, Gianna Olinda Cadonau, Jürg

Gautschi e Leo Tuor prelegian novischems e vegls impuls davart sbufs e fitness, chadainas da naiv e cristals. Dumengia, ils 25 da favrer 2018, è l'agentura da reclama Geyst a Turitg ospitanta da «Sin il viv!». Plinavant sa ferman ils Impuls a Savognin ed il fanadur 2018 legian auturas ed auturs ina tscherna d'impuls davart zerclim e turists en l'iert da la Chasa Torel a Guarda. La turnea è publica, l'entrada libra e per finir la saira datti mintgamaï in aperitif preparà dals ospitants per far printgas sin la litteratura rumantscha - viva!

Flurina Badel, redactura Impuls

Savevas Vus ...

... ch'ils Cuntrasts da la Televisiun Rumantscha vegnan er emess cun suttitels averts per franzos e talian? Per franzos adina il mardi, a las 13:55, sin RTS DEUX, e per talian il venderdi, a las 13:15, sin RSI LA 2 e la dumengia, a las 7:25, sin RSI LA 1.

«Amur senza fin» cun Cathomas, Jemmi, Schnoz e Zindel

Il settember ed october è il vitg da Sagogn stà il lieu d'acziun principal per l'emprim film dramatic rumantsch realisà da la SRG SSR. «Amur senza fin» duai divertir e purtar il rumantsch viadora en Svizra ed en il mund.

(rtr) L'idea da realisar in film dramatic rumantsch ha Mariano Tschuor, da lez temp directur RTR, lantschà l'onn 2011. Silsunter è vegnida publitgada ina concurrenzia e betg main che 12 istorias èn vegnidas evaluadas en detagl. La redacziun è sa decidida per il project «Amur senza fin» da Sabine Pochhammer, tenor in'idea da Niklaus Hilber e Patrick Tönz. La versiun rumantscha dals dialogs è vegnida procurada da Leo Tuor. Il film vegn emess l'autun 2018 en la televisiun.

Amur, sex e chatscha
L'istoria: cun agid dal nov plevon da l'India emprova Mona da puspe

dar schlantsch a sia letg. Quai intervegnan er autras dunnas che vulesan medemamain profitar dals tips dal plevon. Che quai dat bler da discurrer en vischnanca, è bain cler. Tut quai capita en ina tipica vischnanca rumantscha. Ils abitants sa conuschan, s'inscuntran en butia ed en ustaria. Las dunnas fan plans per il futur da lur famiglias ed ils umens van ensemene a chatscha. Bunamain dus mais è stada en Surselva l'equipa da Zodiac Pictures cun il reschissur Christoph Schaub. En pli èn era bleras statistas e blers statists indigens, uffants da scola e creschids, stads engaschads per ina u l'autra scena dal film.

70% dal film vegn ad esser per rumantsch e 30% per tudestg. Ch'il rumantsch è bain represchentà sa manifestescha era cun dar in sguard sin la glista dals acturs. Cun Bruno Cathomas, Marietta Jemmi, René Schnoz e Tonia Maria Zindel è la garda d'acturas e d'acturs rumantschs bain represchentada. Per blers dad els n'è il rumantsch dentant betg pli il linguatg da mintgadi ed era betg il linguatg, cun il qual els lavuran. Per els – dentant en empriima lingia per las acturas ed ils acturs betg rumantschs – è Mario Pacchioli vegnì engaschà sco coach e magister da lingua.

L'emprim film dramatic rumantsch?

I na dat betg blers films dramatics rumantschs, e quels paucs sa basan per il pli sin texts litterars existents, èn vegnids realisads cun meds

finanzials modests e per la pli gronda part era cun acturs laics. Quai vala per las producziuns che Mic Feuerstein, reschissur ed um da camera da la Televisiun Rumantscha, ha realisà a basa dad ovras da Gion Deplazes: 1979 Flurs da glatsch, 1993 Levzas petras, 1998 Sul cuolm. 1985 ha Joseph Scheidegger realisà il film Retuorn tenor il raquint Accord dad Oscar Peer cun Vadim Glowna en la rolla principala. Dino Simonett ha fatg il 1993 il film La rusna pearsa e Pascal Bergamin il 2005 Staila crudanta. En quest senn è «Amur senza fin» – ina coproducziun da la SRG SSR en collavuraziun cun SRF, RTR ed ils producents da «Die Göttliche Ordnung» u «Heidi», Reto Schärli e Lukas Hobi da Zodiac Pictures – propri l'emprim film dramatic rumantsch che vegn realisà dad A fin Z sut condiziuns professiunalas.



Ils 30 da settember èn represchentants da la cultura, da la politica e da las medias vegnids infurmads a Sagogn davart il project «Amur senza fin».

In chanastrer, ina scola ed in emigrant

Films, fotografias, brevs, artitgels da gasettas e l'istorgia aventurusa da Gion Peter Casanova da Vrin. Tut quai è da chattar sin nossastorgia.ch.

(rtr) L'entschatta d'october han RTR e la fundaziun «FONSART» presentà l'emprima plattaforma digitala, istorica e participativa da la Svizra rumantscha e dal Grischun. Sin «nossastorgia.ch» pon privats ed instituziuns metter online lur fotografias, videos u dossiers e parter quels cun la communitat.

La finamira da la nova plattaforma è da crear ina cuminanza d'utilisaders che documentescha e reconstrue-

scha muments extraordinaris e specialis da la Svizra rumantscha e dal Grischun. Ils utilisaders da «nossastorgia.ch» sa registreschan sin la plattaforma e deponan fotografias, films, videos, registrazions da tun e testimonianzas en scrit ubain outras funtaunas actualas ed istoricas.

Istorgia da success dapi il 2009 La plattaforma «nossastorgia.ch» è vegnida sviluppada a basa d'in

project da Radiotélévision Suisse (RTS) e da la Fundaziun per il manteniment dal patrimoni audiovisual da RTS (FONSART) che ha lantschà l'onn 2009 en Svizra franzosa la plattaforma [notreHistoire.ch](#). Sin fundament dal success en quella regiun ha la SRG SSR decidi da realisar tales plattaformas er en outras regiuns linguisticas da noss pajais. Da quella offerta han fatg diever RSI en Svizra taliana ed RTR en Svizra rumantscha.

Ladina Heimgartner, directura RTR, sa legra che la plattaforma stat ussa er a disposiziun en ina versiun rumantscha: «Cun sostegn

da nossa chasa-mamma, la SRG SSR, avain nus pudì realisar quest project che pussibilitescha ad RTR da render accessibel a la publicitat anc meglier ses archiv audiovisual. Da cuminanza cun noss public vulain nus scriver l'istorgia da nossa regiun.»

Stgazis dal passà

Dapi l'october han già plirs millis da persunas visità nossastorgia.ch, prendì invista dals films e dals documents che RTR ha arcunà ed uschia era nizzegià la plattaforma per far accessibel ses archiv a la publicitat. Da chattar sin la pagina è material da persunas privatas e d'instituziuns, sco per exemplar da la Biblioteca chantunala ubain da la Fundaziun grischuna per la fotografia. Tranter questi documents sa chattan lura era – per numnar sulettamain intgins exempels – in film davart la lavur dal chanastrer che la Televisiun Rumantscha ha realisà l'onn 1972, fotografias da Gion Peter Casanova da Vrin ch'è emigrà l'onn 1913 en ils Stadis Unids da l'America e che ha lavourà vi surmar sco um da camera ubain ina fotografia da la scola da Mustér en construcziun. Nus avain mirveglias, sch'i dess forsa anc dapli fotografias dal bajetg ch'è vegni construi ils onns 1951-1952. Datti forsa perditgas che pudessan raquintar istorgias e reminiscenzas dal temp da la construcziun? E segir datti era bellas fotografias da scolars e da scolasts che han visità da quest temp la scola da Mustér.

Visitai la pagina [nossastorgia.ch!](#) Fufragnai en ils documents, las fotografias ed ils films. E betg embli-dai da parter Vossas istorgias personalas cun nus e cun tut ils visitanders da la pagina – ensemble vulain nus scriver l'istorgia da la Svizra rumantscha e dal Grischun.



Avais era Vus fotos da la chasa da scola e da classas che han frequentà la scola da Mustér? Plassai quellas sin [nossastorgia.ch](#)

MINISGUARD

MINTGA SONDA A LAS 17:40 SIN SRF1



Il film «Gisula Tscharner – la tiara pli datiers ch'il tschiel» da Christina Caprez è in purtret subtil d'ina dunna cun in agen chau.



Hubert Venzin en la rolla dal pur Rumias Curschellas da Selva en il film «A la sumbriva dal Tambora» da Gieri Venzin.



Gabriella Gerber decida da betg pli colurar ses chavels grischs: «Dar colur – mussar colur» da Menga Huonder-Jenny.

Amalia ed il vulcan – ils films rumantschs da cineastas e cineasts independents

RTR coproducescha mintg'onn films da cineastas e cineasts independents. Quest onn èn quai stads set differents projects «libers» ch'en vegnids emess en ils Cuntrasts.

(dt/bg) Tge ha Amalia Malchiodi che viva a New York da far cun il vulcan Tambora en l'Indonesia? Atgnomain pauc, i dat però ina fina collaziun. Tant Amalia Malchiodi sco er il vulcan Tambora èn stads protagonists da films da cineastas independents che RTR ha coproduci l'onn 2017.

da cineastas e cineasts independents, vul dir dad auturas ed auturs da film che lavuran sin basa libra e che realiseschan gia dapi blers onns films documentars. Regularmain lavuran ensemens cun RTR: Susanna Fanzun, Manfred Ferrari, Menga Huonder-Jenny, Gieri Venzin, Ivo Zen e blers auters.

Set films independents

La gronda part dals films ch'ils Cuntrasts mussan è reportaschas, purtrets e documentaziuns che l'atgna redacziun realisescha. I dat però excepziuns. Var quatter fin set dumengias l'onn emetta RTR era films

Chavels ed erupziuns

Trais exempels da coproducziuns dal 2017: gia l'entschatta da l'onn han ils Cuntrasts emess il film «Dar colur – mussar colur» da la cineasta Menga Huonder-Jenny. In film che mussa cun tgeninas ponderaziuns

che dunnas laschan colurar lur chavels u era betg. Menga Huonder-Jenny ha già realisà trais films ensemble cun RTR. L'avrigl 2017 han ils Cuntrasts emess alura il film «Amalia e Giancarlo» da Christoph Schreiber e Kurt Reinhard. I sa tracta d'in purtret d'Amalia Malchiodi e da ses figl Giancarlo che vivan uss a New York, ma che visitan suenter blers onns puspè ina giada Sagogn, lur anteriura patria. Per RTR è quai stada l'emprima collavurazion cun ils dus auturs da lingua tudestga. E finalmain la fin d'october han ils Cuntrasts mussà il film dal Tuatschin Gieri Venzin «A la sumbriva dal Tambora», in film docufictiv sur da las consequenzas desastrusas che l'erupziun dal vulcan Tambora ha già il 1816/17 era per las vals grischunas, p.ex. per il Tujetsch.

In'incumbensa da la SRG SSR e da RTR

Sin nivel naziunal èsi incumbensa da la SSR da cofinanziar cun sias taxas da concessiun era la branscha independenta da film. Totalmain sostegna la SSR quella branscha mintg'onn cun var 27,5 miliiuns francs. Bunamain mintga film svizzer che vegn en ils kinos u en la televisiun vegn uschia era sustegni cun las taxas da concessiun. Films rumantschs per il kino nadatti sa chapescha quasi mai – e perquai s'ha etablida ils davos onns la stretga collavuraziun da films documentars tranter Cuntrasts ed ils cineasts independents rumantschs.

Il sostegn che RTR po impunder ora da las taxas munta a var 300'000 francs per onn.

Ils films independents che Cuntrasts ha emess il 2017:

- Amalia e Giancarlo (Christoph Schreiber e Kurt Reinhard)
- Dar colur – mussar colur (Menga Huonder-Jenny)
- Gisula Tscharner (Christina Caprez)
- L'assassin grischun e la revoluziun (Helen Stehli Pfister)
- Kauffmann anghel (Adrian Zschokke e Fred van der Kooij)
- Piz Jazz (Felice Zenoni, Iris Rüfenacht-Kappeler)
- A la sumbriva dal Tambora (Gieri Venzin)



Amalia Malchiodi raquinta a ses figl Giancarlo da las experientschas ch'ella ha fatg da giuvna.

In café per 2xNadal: perquai che plaschair regalà è plaschair dubel

Nadal è la festa dal plaschair. Ins passenta quel temp cun la famiglia e cun amis ed ins regala in a l'auter pitschnas e grondas surpraisas. Dentant, betg tuts pon giudair quel temp.

(sg) Surtut là, nua ch'ins ha gist vablas, arttgels d'igiena e termagls per uffants.

Nadal differenta. Pertutgadas èn savens persunas attempadas che vivan sulettas u er uffants che vi-

vian en asils e chasas d'uffants senza lur famiglias. Cun l'acziun 2xNadal vulessan la SRG SSR, la Posta Svizra, Coop e la Crusch Cotschna Svizra gidar comunablaman quellas persunas basegnusas.

Cun l'acziun da solidaritat 2xNadal pon ins reparter regals era suenter ils dis da festa. Lura betg pli ad amis ed a la famiglia, mabain a persunas basegnusas.

Giavischà èn spezialmain pachets cun arttgels per il basegn dal mintgadi sco mangiativas conser-

In café cun Gaby e Tona

Ils 29 da december 2017 ed ils 4 da schaner 2018 metta il program dal Radio Rumantsch en il center 2xNadal. RTR visita sias audituras e ses auditurs a Savognin ed a Glion. Gaby Degonda e Tona Poltera modereschan las emissiuns spezialas, retschaivan giasts e prendan en- cunter las donaziuns da las abitan- tas e dals abitants da la regiun. L'acziun da solidaritat da venderdi, ils 29 december a Savognin vegn emessa da las 09:00-12:30 e da las 13:00-14:00 dal Center da sanadad e stat sut l'ensaina da la nostalgia: Nadal ier – Nadal oz.



Gaby Degonda e Tona Poltera che sa legran gia oz da Vossas visitas a Savognin ed a Glion. Dapli da l'acziun naziunala «2xNadal» sin la pagina 2xweihnachten.ch/rm

Gievgia, ils 4 da schaner, beneventan Gaby Degonda e Tona Poltera ils auditurs e giasts a Glion. Giast da RTR è per exempl Carmelia Maissen, la presidenta communal

44avel Top Pop Rumantsch – lioms dapi l'uffanza

Suenter ina lunga pausa creativa turna la retscha da Top Pop Rumantsch da RTR – D'n'S chanta «Grazia».

(bv) Debora Lutz da Glion e Sina Halter da Surcuolm sa conuschan già dapi passa set onns, s'entupadas èn ellas a chaschun da lur participa-



Il duo sursilvan D'n'S: Debora Lutz (a dretga) e Sina Halter.

ziun al musical «High School» a Glion. En lur nova chanzun autobiografica «Grazia» dechantan ellas lur amicizia dapi l'uffanza, «ensemen far musica ha nus ligiau» hai num en in lieu da la chanzun. La melodia dal toc, cumponida d'in lavuratori american, fa propi cupitgolas alle- gras e las duas vuschs èn zunt finas, vuschs che fan endament la chan- son innocentia franzosa. En vardad han Debora e Sina, ubain D'n'S – lur num d'artistas – già daditg bandunà la tgina materna. Ina studegia psi- cologia a Turitg, l'autra linguistica a Winterthur, ed ellas partan in'abitaziun. Tranteren fan ellas era pitschnas represchentaziuns ac- cumpagnadas da clavazin e ghitara. Là interpreteschan ellas inqua-

D'n'S: Grazia

Text: D'n'S

Musica: Vince Quintero

Battaria: Rolf Caflisch

Bass: Lucas Schwarz

Guitarra: Dominik Eberle

Keyboards, percussiun e

programmings: Manfred Zazzi

Producziun: Manfred Zazzi

represa, ma surtut atgnas chan- zuns magari in zic pli melanconicas che quest Top Pop zunt legraivel. Duas soras musicalas, e quai «dapi gl'empremmument», scol'entschat- ta da la chanzun di. D'udir sin la fre- quenza e la pagina da RTR.

«Di dal futur» tar RTR: Cun indesch onns davos il microfon

Ils 9 da november han 10 uffants fatg ina visita en chasa RTR. En il rom dal Di dal futur han els guardà davos las culissas da la chasa da medias rumantscha. La motivaziun da vegnir gist tar RTR è stada tar mintga uffant in zic in'autra.

(pb) Uschia ha per exemplel l'onda da Leonie lavurà tar RTR, Ursina ha emprendì en scola rumantsch grischun e vuleva far insatge cun quest linguatg ed Amélie ha la mamma che lavura tar la Televisiun Rumantscha. Co che Amélie ha passentà il Di dal futur raquinta ella gist sezza.

Jeu vess mai tertgau ...
... ch'ei detti tontas professiuns tier RTR – en tut 30!

Da quei che ha da far cun la televisiun enconuschevel jeu in tec dalla mumma.

Denton jeu hai viu che quei ei gie mo ina pintga part.

La Prisca ha mussau a nus las differentas partiziuns sin la tura atras la casa RTR.

Zaco ei mintga professiun tut autra che l'autra e tuttina han tuttas da far zatgei ina cun l'autra.

Sil placat cun tut ils collavuraturs vein nus mintgamai fatg in rudi tier tgi che nus essan stai. In pèr enconuschevel jeu schon.

Nus vein buc mo mirau. Nus vein era luvrau.

Suenter nossia tura vein nus empriu



Amélie Rothmund (11), la pli giuvna moderatura dal Radio Rumantsch.

co far in'intervesta. Suenter vein nus grad emprau ora quei.

Nus vein astgau far damondas als collavuraturs da RTR. Tuts han priu peda per nus, ein stai interessai e fetg hoflis. Quei ha plaschiu a mi.

Tier quels dalla tecnica da televisiun vein nus astgau experimentar: smaccar nuvs, far ir hebels, star davos la camera e far trics ella green-

box. Giez ei stau coolira. Il punct sigl i ei stau cu jeu hai astgau preleger live in salid duront las gratulaziuns cun la Ladina Schena.

Lu hai jeu schon giu battacor. Ils autres affons han detg che mes mauns tremblavien.

Jeu hai salidau la tatta Anita. Che lezza hagi plascher dil salid hai jeu schon sminau.

Mo jeu vess mai tertgau ...
... che nus omisduas survegnient resuns dalla glieud che teidla mintga di Radio Romontsch.

Jeu engraziel fetg a gl'entir RTR per quei bellezia Di dil futur che jeu hai astgau passentar tier vus.

Cars salids
d'Amélie Rothmund



Nus vegnin tar Vus!

Per far pli enconuschenta e preschentar la nova purschida visita RTR diversas canortas e participescha l'onn proxim a las festas d'uffants a Laax ed a Savognin.

Avais Vus inputs, ideas e propostas per la purschida d'uffants da RTR?

Alura tramettai quels a communicaziun@rtr.ch

Era quai ha muventà RTR e ses public durant il 2017



1 Ils 29 da november è stada en il center. 2 Fil design da la TR. 3 Sin i senza fin». 4 En discurs Ils victurs: 5 Dal lontan Suisse Quiz. 7 Premi SI cumpagnia» cun Martin interss per la laver da prim «Di digital». 10 In WEF 2017: Vicepreside





2



3



4



7



8

cun schurnalista RTR. **11** Sentupadas cun il public. **12** Discussiun animada al podium «Gieus olimpics d'enviern 2026» **13** Gilles Marchand, directur SRG SSR visita RTR. **14** Al campiunadi mundial da skis a San Murezzan. **15** L'infrastructura per registrar daventa adina pli simpla. **16** Grond interess per las premieras da film da RTR. **17** Quater damas e la nova plattaforma nossaintorgia.ch.

la midada dal clima
mada per il nov
el set dal film «Amur
s cun noss public.
n el Grischun. **6**
RG.R 2017. **8** «Da
na Linn. **9** Grond
RTR a chaschun dal
scunter spontan al
ent dals Stadis Unids



11



12



15



16



17

Da giuvens 30 onns fin a 30 onns experientscha

(td) Dapi il 1. da november 2017 fa era Flavio Bundi (30), il nov schefredactur, part da la direcziun RTR. Gist a chaschun da ses emprim di da laver ha Pius Paulin, schef tecnica, festivà ses giubileum da 30 onns tar RTR. Quai mussa bain la diversitat da la nova direcziun. D'ina vart

La direcziun RTR sa cumpona da:

Ladina Heimgartner, directura RTR

Flavio Bundi, schefredactur

Tamara Deflorin, scheffa communicaziun

Beat Lozza, schef servetschs centrals

Pius Paulin, schef tecnica

Gian Ramming, schef svilup



pudain nus uschia profitar da blera experientscha professiunala e da l'autra vart avain nus la generaziun giuvna che porta nov schlantsch en chasa. Nus ans le-grain da pudair manar RTR cuminaivlamain vers il futur e da prender per mauns las sfidas che spetgan nus ils proxims onns. Gugent avain nus adina in'ureglia averta per Vossas dumondas e Voss inputs, per laud e critica.

La nova direcziun da RTR. Davant da sanestra: Ladina Heimgartner, Flavio Bundi. Davos da sanestra: Pius Paulin, Tamara Deflorin, Beat Lozza, Gian Ramming.

BarattaChor – aventura per chorus e dirigents

In chor stat a cor a ses dirigent u a sia dirigenta. Ma igl è la variaziun che fa bun tun. Perquai porscha RTR il barat da dirigents e chorus.

(ab) «BarattaChor» è in'acziun da RTR per promover il barat tranter dirigentes, dirigents, ma era tranter ils chorus. Questa acziun dat novs impuls, pussibilitescha in barat da cultura e porta in vent frestg en las provas dals chorus. L'acziun è vegnida lantschada la fin d'october dal Chor mischedau Sevgein e lur dirigenta Flavia Walder. «A

mai plascha l'idea da l'acziun. Jau sun da l'opiniun che quai saja ina chaussa innovativa che porta variaziun en las provas da chor», di Flavia Walder.

Denant ha il chor da Sevgein e lur dirigenta fatg il barat cun il Chor maschadà rumantsch da Turitg. Sch'era Vus avais gust da l'aventura dal barat tranter

dirigents e chorus, chattais dapli infurmaziuns sin rtr.ch.

Noss chorus sin Facebook
Vulais Vus adina esser infurmà da quai che capita en la scena da chorus e davart las novas emissiuns da chant e musica en il program da RTR? Lura visitai la pagina da Facebook da RTR, rubrica «Noss chorus».



La permiera è grategiada! Flavia Walder, dirigenta Chor mischedau Sevgein, e Remo Weishaupt, dirigent Chor maschadà rumantsch Turitg, han BarattaChor.

Curt e compact – la survista da l'acziun «BarattaChor»

- chorus s'annunzian per far ina prova cun in/a dirigent/a d'in auter chor
- il/la dirigent/a tira la sort
- il/la dirigent/a fa ina prova cun il chor victur
- il/la dirigent/a dal chor victur fa ina prova cun il chor da barat
- il/la dirigent/a dal chor victur fa l'appel per il proxim «BarattaChor»

Sur Marcus Flury – 37 onns per la cumissiun ecclesiastica

Ina giada ad onn s'inscuntra la redacziun da l'emissiun «Vita e cretta» cun la cumissiun ecclesiastica da RTR per in barat d'experienschas.

(gd) La cumissiun ecclesiastica sa cumpona actualmain da la predigtanta e decana Cornelia Camichel, dal reverenda Stefan Bösiger, sur Marcus Flury, reverenda Fadri Ratti e da diacon Guido Tomaschett. Els promovan il contact ed il barat regular da RTR cun las dua

s Baselgias chantunalas. A chascun da l'inscunter dals 9 da november ha la cumissiun constatà

Temp d'emissiun dal magazin «Vita e cretta»:
Dumengia, 8:00-9:00 e
20:00-21:00 (rep.)

cun plaschair che RTR na tracta e reflectescha temas e dumondas en connex cun etica, morala e religiun betg mo en il magazin «Vita e cretta», mabain er en autres emissiun u schizunt cun in'ema tema sco «Da cruschs e cots – 500 onns refurmaziun». Ils films, las contribuziuns ed ils cuntegns online da

quest'ema tema èn vegnids percepids sco fitg infurmativs, freestgs ed adina puspè surprendents. L'ema haja purschì invistas en in process istoric, dentant era contribuì a la chapientscha tranter las duas confessiuns.

Las mirveglias èn creschidas
Durant l'inscunter annual ha sur Marcus Flury annunzià sia demisiun. Dapi il 1980 è el commember da la cumissiun ecclesiastica, ha fatg predis al radio sco er en la televisiun ed è s'engaschè tut quels onns per in dialog tranter las Baselgias ed ils meds da massa, però era tranter las Baselgias e confessiuns sezzas. Marcus Flury ha vis a vegnir ed ad ir quatter directurs ed ina directura da RTR ed ha accompagnà durant quests 37 onns las grondas midadas e discussiuns er a l'intern da la cumissiun ecclesiastica. Gievi ils onns 1980 en la cumissiun anc ferm per garantir ina scumparti-



Sur Marcus Flury è stà durant 37 onns commember da la cumissiun ecclesiastica da RTR.

zun paritetica dals predis ed ina preschientseca equivalenta da temas refurmads e catolics al radio – sajan ozendi creschida la chapientscha e las mirveglias vicendaiwas. E las duas Baselgias hajan

da cumbatter oz cun sumegliants problems e dumondas. En num da RTR in grond grazia fitg a sur Marcus Flury per sia lavour prestada e sia prontezza d'adina puspè star a disposiziun cun pled, fatg e cussegli.

Er in album da fotografias po esser in archiv

In archiv è bain structurà, las essenzias¹ èn zavradas e deponidas bain ed endretg. Las metadatas² èn structuradas tiptop e nudadas en cudeschs, sin cartas u en bancas da datas. Uschia la definiziun d'in archiv sco jau hai era scrit quai en l'emprima ediziun dals «1000 segns da l'archiv». I dat dentant anc tut auters archivs, da quels ch'ins n'è gnanc conscient ch'els èn tals! Tgenins?

N'avais Vus mai passentà in di da plievgia en stiva, cun ina tschigu-latta chauda sin maisa, sfegliond en l'album da fotografias cun la-schar reviver temps daditg pas-

sads e cun baininqual «ah, gea, quai eran anc temps» u «sas anc...»?

Geabain, er in album da fotografias è in archiv, ubain la stgatla cun

tatgà las fotos en l'album u simplamain mess en ina stgatla per ordinar pli tard. Las fotos èn perditgas da l'istorgia da famiglia. Dentant betg mo, ellas pon era

nossaIstorgia.ch. In e scadin po metter fotos e documents da tut gener sin questa piattaforma e/u complettar materialias ch'en già vegnidas arcunadas sin nostraIstorgia.ch cun atgnas infur-maziuns ed istorgias.

Gea, era nossaIstorgia.ch è in archiv – ma in archiv interactiv ed avert per tut quels che s'interesse-schan per l'istorgia da la Svizra ru-mantscha e dal Grischun.

Alexi Monn, responsabel d+a

1000 segns da l'archiv

brevs d'amur u da quellas dals geniturs al fegl insanua en plaza. Tut stgazis personals – perditgas da temps passads. Tuttina, sch'ins ha tgirà bain quels cun descriver tgi e tge ch'ins vesa sin la foto,

documentar muments d'interess public sco per exemplu in'instru-mentaziun, l'avertura d'ina scola e bler auter. Fotos che pudessan interessar blers – e che Vus pudais parter cun auters sin la piattaforma

¹ fotos, brevs, bindels magnetics, cas-settas da musica e bler auter

² numbs ed autres infur-maziuns da las essenzias



Tge stgazis sa zuppan en l'archiv da RTR? Ils visitaders da la «Sonda lunga» èn vegnids infurmads ed han pudì far retschertgas extendidas.



Sco vair pigliasis è sa mussà il lavuratori per construir in radio DAB+ che RTR ha offrì durant la «Sonda lunga».

«Sonda lunga» tar RTR – zambregiar, moderar e cuschinlar

Bunamain 850 persunas han visità ils 11 da november la chasa RTR. En collavuraziun cun students da la HTW a Cuira han ins offrì in program multifar per pitschen e grond.

Passa 40 uffants han profità da la chaschun ed han construì in radio DAB+. Anc ina giada tants han cuschinà stailas saladas e dultschas cun Sergio Guetg, moderatur dal Radio Rumantsch e cuschinier da hobi ambiziunà. Dasperas han visitadoras e visitaders sa chapescha era gù la chaschun d'emprender d'enconuscher en ils studios da radio e televisiun la lavour concreta da las redacturas e dals redacturs RTR. In mument ha la chasa RTR sumeglià in furnicler, e per baininqual giast ch'avess gugent zambregià u cuschinà n'hai deplorablamain betg gi plazza.

Stgazis dal passà e musica moderna

Redacturs e collavuraturas han gidà a far retschertgas ed a chattar en ils archivs ivettas filmicas per exemplel da lieus e persunas dal temp d'uffanza da las visitadoras e dals visitaders. L'interess ha den-

tant era sveglià la nova plattaforma «nossaIstorgia.ch» che RTR ha lantschà l'october passà. En la chasa da medias èn era stads d'udir tuns pli moderns. La giuvna chantautura Chiara Jacomet è sa presentada cun chanzuns da ses nov album che porta il titel «Mascra» e Severin Brugger e Laura Loretz han

fascinà il public cun lur simbiosa da musica multifara e lirica en dialect tuatschin.

Diana Jörg Spescha,
communicaziun RTR



La concurrenzia?

Co ha num la turnea 2018 dals Impuls?

- Impuls en viadi**
- A la tschertga da pleds e poesias**
- Sin il viv**

Premi:

1 radio DAB+



Tramettai la resposta fin ils 5 da favrer 2018 ad:

accents@rtr.ch ubain a
RTR Radiotelevisiun Svizra Rumantscha
Accents
Via da Masans 2
7000 Cuira

La victura da la davosa concurrenzia:
Regula Mognetti, Rabius

Barats da program sur ils cunfins rumantschs

Entaifer la SRG SSR datti gruppas da lavur che collavuran, che barattan ideas e che realiseschan da cuminanza emissiuns sur ils cunfins linguistics.

(rs) Ils emetturs da televisiun da la SSR han intensivà ils ultims onns la collavuraziun: i vegnan barattads dapli films e contribuziuns, ed i vegnan producidas serias communablas sur dad eveniments gronds sco per exempl l'avertura dal tunnel dal Gottard, la Festa federala da musica, u realisà da cuminanza l'emissiun dal 1. d'avust. E mingatant vegnan era concepidas communablaman serias davart tematicas betg exnum actualas: ils Svizzers, il pli bel vitg da la Svizra, bainvegni en Svizra u ina seria da la Crusch Cotschna Svizra. Er en la

rait datti adina puspè producziuns communablas: cliCHés u STHopp Suisse, Helveticus, Filosofix.

Dapi tschintg onns: ils auters

Al radio è la collavuraziun in zic autra. Il radio na po betg lavurar cun purtrets. Il radio è lingua, musica e basta. Sin il champ da la musica èn ils ultims onns era veginids fatgs blers sforzs da lavurar pli stretg ensemble: 8x15, Pavillon Suisse, mx3, gruppa da folclora, jazz ed auter. E lura datti dapi il 2011 er «ils auters, les autres, gli altri, die Anderen». Audituras ed auditurs da radio fidaivels enconuschan sa chapescha la rubrica. Qua rapportan correspondentes rumantschas che vivan en las otras regiuns linguisticas da la Svizra da las atgnadads, spezialitads e singularitads da «lur» regiun.

Ils auters sin RTR, Radio Rumantsch: dumengia a las 12:45
Les autres sin RTS, la première: gievgia a las 15:05
Gli altri sin RSI, Rete Uno: sonda a las 8:30
Die Anderen sin Radio SRF1: sonda a las 10:10



En la rubrica «ils auters» dal Radio Rumantsch rapportan Laura Keller (a sanestra) e Donata Vallino regularmain da quai che ha muventà, fatschentà ed occupà nossas vischinas e noss vischins en Svizra franzosa.

Uschia han audituras ed auditurs dal Radio Rumantsch per exempl udì dals plans per ina pendiculara sur il Lai da Turitg, da la liongia da brassar da Son Gagl vegana, da la scena da cumediants en Svizra franzosa u co ch'il Tessin venere scha ses clown Dimitri, mort avant

bundant in onn. E viceversa audan las otras regiuns istorgias da la chatscha grischuna, da l'exposiziun da Not Vital en il Museum d'art dal Grischun ubain nossas discussiuns en connex cun il rumantsch grischun.

En memoria



Pader Clau Lombriser
(*1947 – †2017)

(rtr) Clau Lombriser è naschi il 16 da matg 1947 a Rabius. El fa la matura en claustra a Mustér, studegia teologia a Cuira, Friburg e Paris. L'onn 1978 vegn el ordinà sco spiritual en la claustra da Glion. Silsuenter sa renda el sco missiunari a Kigalia en Ruanda/Africa. Suenter 10 onns returna el en Surselva, pastorescha en la claustra ed en l'hospital da Glion ed en l'entira Surselva. Il 1995 surpiglia ella Mission catholique de la paroisse française a Turitg ed il 2012 prenda el dimora en il convent da son Hiazint a Friburg. Là daventa el administratur da «Fidei Donum» – il post da la conferenza svizra dals uestgs che sostegna ils spirituals

seculars e laics en ils pajais en svilup e l'accumpagnament dals giuvens confrars dominicans.

Il matg 2017 diagnostigescha il medi cancer, ils 2 da settember mora pader Clau, ed ils 6 da settember vegn el accumpagnà d'in grond til da bara sin ses ultim viadi sin il santeri da las soras dominicanas a Glion.

Durant tut ils onns è Pader Clau adina restà en stretg contact cun il Grischun. Dal 2007 fin il 2016 ha el era fatg part da la squadra dal «Forum» da RTR. Sias emissiuns reflecteschan ses grond engaschement per il conuman e sia capaciad analitica spiertusa. Ina da las numerosas emissiuns che restan

en memoria è era quella realisada la fin da december 2007. En quella raquinta el da vals e da glieud ch'en anc pli giud via che outras. El ha preschentà la vischianca da S. Martin en Val Lumnezia, la vita giud via en ils aclauns da Munt, Mariaga e Travisasch. E lura, suenter l'emissiun, da Son Silvester, ils 31 da december 2007, ha Pader Clau schizunt evidà audituras ed auditurs d'accumpagnar el sin in pitschen pelegrinadi tar Sontg Antoni da Travisasch, là nua ch'il «giud via» daventa tuttenina «il center dal mund».


Las emissiuns che Pader Clau Lombriser ha realisà per il Radio Rumantsch pon ins tadlar sin rtr.ch.

In'istorgia da success: las registraziuns da RTR

Onn per onn fa RTR cun ses studio da tun mobil registraziuns en il Grischun ed en l'entira Svizra

(ft) Registriziuns da chant e musica fa RTR gia dapi blers decennis. L'emprima registraziun da quel gener ha il Radio Rumantsch fatg ils onns 1950. Uschia èn sa rimandas en il decurs dals onns passa 11'000 atgnas registraziuns. Ina gronda part da quellas èn registraziuns da concerts. RTR è era preschent a festas da chant e musica ed a festivals da tut gener. Questas registraziuns èn d'udir en emissiuns spezialas sco per exemplu l'«Artg musical», «Noss chorus», «L'Instrumentala» u il «Soundcheck».

In auter segment impurtant èn las registraziuns da repertori. Quai vul dir che RTR va tar in chor u ina musica e registrescha tocs u chanzuns dal repertori actual. Uschia stat a disposiziun musica indigena



En ina pausa da registraziun demussa la Societad da musica Union da Cuira grond interess per noss bus da registraziun.

per emetter en las emissiuns spezialas ed en il program quotidian «Grischun sonor» dal Radio Rumantsch.

RTR na promova betg mo chorus e musicas cun registrar ed emetter lur producziuns, mabain dat era

sustegn finanzial per producziuns da novs DCs e sa gida sco coproducent tar projects pli gronds.

Il 2017 è RTR stà cumpiglia en tschintg projects sco coproducent ed ha dastgà sustegnair ulteriuras tschintg producziuns da DCs. Pli-

navant avain nus era pudì far nov registraziuns da repertori e registrar 20 concerts che sa chattan uss en noss archiv da musica. Sper tut quai è RTR era stà preschent a 12 festivals e festas da chant e musica.

Pertge vulan tuts currer da Malögia a S-chanf?

Jau hai mintg'onn furmiclas en il venter. La bun'ura a las 6:00 a Malögia. Cura che la quietezza sa mida en in travasch enorm cun var 13'000 persunas.

(ds) Ed er a chaschun da l'ediziun da giubileum na vegni betg ad esser auter che l'onn 1969, cura che strusch 1'000 persunas han partcipà a l'emprima ediziun dal Maraton da skis engiadinalis: tuts èn in pau gnervus, han magari anc

fraid, ma sa legran sin ils 42 kilometers fin a S-chanf. Pli tard, enturn las 10:00, puspè furmiclas en il venter. Cura ch'i va per la liongia. Cura ch'ils sperts e las spertas arrivan gia a S-chanf. Sur la punt, ultima curva e lura la guliva en


l'arrivada. Suenter suonda la festa populara: i na finescha betg. Curridras, curriders. Tschients, millis. Tuts cuntents dad avair dumagnà ils 42 kilometers tras l'Engiadin'Ota. Uschia va quai. Onn per onn. Il 2018 per la 50avla giada. RTR gratulescha da cor al Maraton da skis engiadinalis. In eveniment legendar per tut il Grischun.

Cun RTR al puls dal maraton

Perquai rapporta RTR directamain da la loipa, sco adina cun l'emissiun da radio live dal Radio Rumantsch, da la damaun a las 6:00 enfin las 12:00. Sco adina cun tut las vuschs edemoziuns ch'ins vul udir. E cun giasts d'anniversari.

SOUNDCHECK
MINTGAMAI LA SONDA A LAS 19:00

Dapli sin rtr.ch





Per il di dal Pled rumantsch 2017 scriva l'emprima classa secundara da Savognin l'istorgia che vegn zuppada en las valladas dal chantun Grischun.

A la tschertga dal Pled rumantsch 2017

Ensemens cun il public tschertga RTR ils 18 da decembre puspè il Pled rumantsch da l'onn. Tschertgadas vegnan dentant era set parts d'ina istorgia ch'en zuppadas en las regiuns.

(ab) La giuria dal pled rumantsch 2017 sa cumpona dad Anna-Alice Dazzi, linguista RTR, Anita Capaul, manadra da la Chasa Editura Rumantscha e Gion Nutegen Stgier,

Propostas per il Pled rumantsch 2017 pon vegnir inoltradas fin ils 18 da decembre 2017 a las 11:00 cun il formular sin rtr.ch ubain per telefon al numer 081 255 79 00 ch'en funcziun il di da l'acziun a partir da las 6:00.

schurnalist da l'Agentura da Novitads Rumantscha. Da tut ils pleds inoltrads elegia la giuria lur tschintg favorits che van lura en il voting online. Medemamain da quels tschintg pleds elegia la giuria ses Pled rumantsch da l'onn. Tant la giuria sco il public han ina cumpart da 50% tar l'elecziun dal Pled rumantsch 2017.

La cumbinella

L'emprima classa secundara da Savognin scriva cun sia scolasta Zegna Pittet-Dosch in'istorgia curta che cuntegna ils pleds rumantschs dals ultims onns.

Questa istorgia vegn partida en set parts e zuppada en diversas vischnancas en tut las regiuns dal Grischun. Mintg'ura vegnan communitgads al Radio Rumantsch traiss chavazzins che mainan al lieu dal zup, e quai la bun'ura da las 6:00 fin mezdi a las 14:00.

Audituras ed auditurs che chattan in chapitel da l'istorgia pon telefonar en il studio dal Radio Rumantsch e preleger il chapitel ch'e adina scrit en l'idiom da la regiun respectiva.

A la fin è l'istorgia cumplettada d'udir en plirs idioms e da leger online sin rtr.ch en la versiun originala en rumantsch grischun.

Nadal

da Jens Nielsen (translaziun da Silvana Derungs per ils Impuls da RTR)

Tar nus a chasa abitava ina dunna en ina culla dal pignol da Nadal, senza disturbis, probabel onns a la lunga. Fin che nus l'avain chattà in ventgaquatter da decembre. Nus sesevan enturn maisa, mia sora, jau, noss geniturs. Era tatta era là, sco mintg'enviern, vegnind dal nord lontan.

Dasper ella giun plaun giascheva noss dalmatin.

Nus mangiavan dies da portg, giabus cotschen e tartuffels brassads en mel.

Tuttenina ves jau ina culla melna ballantschond en las frastgas dal pignol che era uschiglio immovibel e festiv.

«Guardai ina giada questa culla», hai jau clamà, «ella sa mova.»

Nus essan stads si ed ids vi, mes bab, cun ina lampa da maun, ha guardà viaden.

Ussa vesev'ins ch'insatgi viveva lien.

Mes bab ha prendi la culla giu da la planta e l'ha mess sin la maisa decorada.

«Qua pitgain nus uss lasura», ha decidi mia tatta che era ina dunna cun bler humor.

Ed ella ha prendi chatsch cun il chaz da la sosa ed ha pitgà sin la culla che quella è ida cun in schlop en tocs.


L'abitanta pitschnina giascheva starmentada sin la tuaglia, tranter mobiglias pitschninas, flatgs da sosa e las stgaglias da si'abitaziun.

Cun fadia e vusch gizza è ella stada si, currida tut schoccada sur la maisa, sur l'ur or – anc avant che nus avessan pudì reagir – directamain en bucca dal dalmatin che spetgava già l'entira saira sin vanzadiras.

«Brav», ha ditg mia tatta, charsinond cuntenta ses chau.

Lura ha'l fatg ina da sias immensas risadas.

(or da «Flusspferd im Frauenbad», cumpari en la chasa editura Der gesunde Menschenversand)



RTR sin via tar Vus

Qua chattaïs Vus ina survista dals events, nua che RTR è da la partida.*

Nus ans legrain da Vossa visita.

12-12-2017 a Masagn:

Café Rumantsch cun la directura RTR

15-12-2017 a Salouf:

Premiera dal film «Patricia Scarpatti - mama per 36 uffants»

29-12-2017 a Savognin:

2xNadal: in café cun Tona Poltera

4-1-2018 a Glion:

2xNadal: in café cun Gaby De gonda

11-3-2018 en l'Engiadina:

Maraton da skis engiadinalais

6 fin 8-4-2018 a Cuira:

Festa purila «Agrischa»

27 fin 29-4-2018 a Scuol:

Exposiziun da commerzi e mestier «EBexpo»

25-5-2018 a Landquart:

RTR envida al «Da cumpagnia»

26-5-2018 a Landquart:

Radunanza generala SRG.R

15 e 16-7-2018 a Savognin:

Festa d'uffants

19 fin 21-7-2018 a Degen:

Open Air Lumnezia

21 e 22-7-2018 a Laax:

Festa d'uffants

*Questa survista vegn cumplétada mintga mais.

Dapli infurmaziuns sin rtr.ch.

Bondo – i vegn puspè!

Reporters curran cun cameras e microfons. I mitschan. La presidenta communalà è sblatga. Anguscha en ses eglis.

Jau stun sin il prà ch'è quasi il tett dal tunnel da sviament da Promontogno. Ma la via chantunala mainauss or dal tunnel en ina cuntrada da belma, crappa e lozza. Glieud indigena curra vi e nà. Auters stattan là senza moviment. Il maun davant la bucca. Larmas culan sur la vista.

Nus stuain rapportar

Igl è ils 25 d'avust a las 16.30. Puspè ina bova ord la Val Bondasca. Massas enormas da belma, crappa e lozza vegnan ord la val. Prendan cun sai tut quai che stat en via. La bova vegn plau, sco en ina registrazion retardada, ma ella vegn senza remischun e stgarpa in'ulteriura gronda playa en la vischnanca da Bondo. In telefon al producent a Cuira: puspè ina bova. Nus stuain rapportar! Ma lura sent jau lasemoziuns. Jau bad che jau hai strusch pli vusch per discurrer. Tge dir insumma? Tge capita gist? Hai dà persunas feri-

das? Ha il manischunz dal chavaterra ch'è svanì en la belma pudì mitschar a temp? Tge duai jau raquintar per respectar endretg las personas indigenas che perdan per part en quest mument lur dachasa?

Cun respect e distanza professiunala

Sin il prà a Promontogno gist visavi da Bondo regna caos. Jau emprov da restar calm. Jau emprov da reflectar. Infurmaziuns uffizialas nadatti betg en quest mument. Tuts ston vegnir a fin cun la situaziun. Tuts ston reagir. Era jau: jau tramat in film fatg cun il telefonin a Cuira. In document per la pagina d'internet da RTR. Fotografias. Lura cumenz jau a metter a lieu en mes chau quai ch'è gist capitâ. Jau raquint a mamez anc ina giada tut. En paucas minutaz èsi las tschintg. Ma ussa sai jau tge che jau vi raquintar. Ed jau poss era già

pensar a quai che jau raquint lura gist suenter en il Telesguard.

Jau sent ina maschaida tranter calma e gnervusitad.

Lura èsi las tschintg. En las novitads dal Radio Rumantsch raquint jau live tge ch'è capitâ gist en quels muments a Bondo. Ma durant raquintar sent jau puspè lasemoziuns. Igl esser pertutgà, era sche jau na sun betg da Bondo u Promontogno.

Quai è lura adina puspè il punct dificil tar tut ils rapports che han da far cun las bovas a Bondo. Co poss jau respectar la situaziun dals indigena senza daventar in simpel voyeur? Co poss jau rapportar cun chapientscha per las situaziuns per part tragicas? E tuttina era far las dumondas criticas? A la fin dals quints datti in unic recept: restar in uman cun sentiments umans.

David Spinnler,
producent Engiadina



RTR rapporta da Bondo. Da sanestra: David Spinnler en discurs cun Anna Giacometti, presidenta communalà da Bregaglia, e Martin Kaiser, Uffizi da guaud e privels da la natira dal chantun Grischun.

Patricia Scarpatti – mamma per 36 uffants

«Has già gi la virola selvadia?». Quai è stada ina da las emprimas dumondas che Patricia Scarpatti ha fatg cura ch'ella è veginida per mai a la plazza aviatica a Honduras.

Plirs dals 36 uffants che vivan en sia chasa d'uffants «Yo quiero ser» eran infectads cun quest virus. Plinavant fascheva in'infecziun dals egls la

pau cun mia camera. Jau ma sun spert sentida bain en il ravugl da quests uffants che han per part istorgias fitg tristas.

Cordial invit

a la premiera publica dal film, venderdi, ils 15-12-2017, a las 20:00, en halla polivalenta a Sa-louf.

Il film dals Cuntrasts è da vesair dumengia, ils 17-12-2017, a las 17:25 sin SRF1.

L'emissiun chatt'ins lura era sin play RTR ed rtr.ch.

runda. Il pli tard lura èsi stà cler a mai che quai dettia ina filmada plain aventuras. «¡Hola Paula! ¿Qué tal?». Strusch or da l'auto han ils uffants beneventà mai cun in'embratscha-da. Spert han els stuì constatar che jau chapesch in pau spagnol, che jau discut dentant plitost cun pes e mauns. Quai n'ha dentant betg di-sturbà els. Il principal è stà ch'els possian ina giada experimentar in

Laschà il cor a Honduras

Ir a Honduras, s'engaschar per uffants en miseria e turnar suenter in onn. Quai era il plan da Patricia Scarpatti da Cunter. Il voluntariat en ina chasa d'uffants ha dentant midà tut. Ella è bain turnada en Svizra suenter in onn, il cor ha ella dentant laschà en l'America centrala. Ella è turnada a Honduras ed ha fundà in'atgna chasa d'uffants. Oz, 10 onns pli tard, viva ella cun 36 uffants a San Pedro Sula. Malgrà che lur dachasa è circumdà da mirs e fils d'atschal è quai per Patricia Scarpatti l'insla dal cletg – cun il num «Yo quiero ser». Qua vul ella dar als uffants che han per part ina istorgia tragica, ina nova schanza. Il biro è il center da la chasa. Tgi che ha per exemplé la virola selvadia splunta a l'isch dal biro e spera che Patty, sco quai ch'ils uffants num-



Paula Nay, l'autura da «Patricia Scarpatti – mamma per 36 uffants», cun Geovanni e Santos ch'en da vesair ils 17 da decembre en ils Cuntrasts.

nan ella, haja in tric per ch'i chalia da morder.

Respect da filmar

L'emprima notg hai jau durmì mise-rabel. Malgrà dus ventilaturs en chombra era quai sco da durmir en ina sauna. La damaun marvegl da las 5.00 eri a fin cun il ruaus. Ils uffants levan mintga lavurdi da que-stas uras, ensolvàn e sa preparan per ir a scola. E per Patricia cumen-zan lura las lavurs administrativas ed organisatoricas. Jau hai già grond

respect d'accumpagnar ella durant far las cumissiuns en citad, ina da las pli privlusas citads da l'entir mund. Filmar en in quartier, nua ch'ella gida famiglias che ston viver en baraccas, è medemamain stà in'experiéntscha che jau na vegin mai ad emblidar.

Il film «Patricia Scarpatti – mamma per 36 uffants» mussa pertge che la dunna da 36 onns s'engascha per tants uffants, 24 uras al di, set dis l'emna.

Paula Nay, redactura Cuntrasts

**L'EMPRIMA PLATTAFURMA DIGITALA,
ISTORICA E PARTICIPATIVA
DA LA SVIZRA RUMANTSCHA
E DAL GRISCHUN**

nossaistorgia.ch



Radio Rumantsch – il svilup da las emissiuns

... cintinuaziun da l'ultima ediziun dals ACCENTS

1997 Dapi l'entschatta da fanadur vegn il program dal Radio Rumantsch (RR) era derasà sin il satellit Astra ed è cun quai da recepir en tut l'Europa. Cun 4870 uras da radio l'onn vegn extendida l'offerta da program anc ina giada. Durant

l'emna vegn il program quotidian amplifitgà per in'ura, la sonda e du-mengia per trais uras. Cun quest augment mutta il temp d'emissiun a bundant 14 uras a di.

1999 Ils 4 da schaner han las emissiuns «Allegra» e «battaporta» pudi festivar lur giubileum da 15 onns. Dapi l'entschatta da december

emetta il RR ses program da la da-maun a las 6:00 fin la saira a las 21:00 (15 uras a di).

2002 L'october survegn il Grischun Central cun Ursus Baltermia in cor-respondent dal RR a temp cum-plain. Il studio sa chatta a Savo-gnin.

2004 En il decurs da l'emprim mez onn vegn l'offerta dal RR restructu-rada cumplettamain. L'infurma-zion ed il program accumpagnant vegnan mess ensenem, las squa-dradas da lavur cumponidas da nov ed il program dal di reggruppà en trais blocs. Differentas emissiuns han novas furmas e novs cuntegns. «Echo der Zeit» da SR DRS vegn in-tegrà ed emess a partir da las 18:30.

2006 Ils 15 da matg vegn emessa l'emprima emissiun dal RR or dal nov center da medias RTR a la Via da Masans 2 a Cuira. Durant l'onn han ins fatg in ulterior pass en direcziun d'in program da radio da 24 uras. Dapi ils 6 da

november pon ins sa laschar dasdar cun in program da musica populara gia la damaun baud a partir da las tschintg e terminar il di da mesan-notg cun «Chara lingua», in dals imnisrumantschs. Novas emissiuns da pled, infurmaziun, umor e satira, cultura, economia e lifestyle cum-pletecheschan la nova purschida.

2008 Dapi il favrer emetta il RR du-rant 24 uras, cun novitads ru-mantschas da la damaun a las 6:00 fin la saira a las 23:00. Il program da la notg porta musica grischuna e da las 0:00 fin las 2:00 rock dir.

2012 Ils 30 da schaner va il nov pro-gram dal RR on air. La nova struc-tura da program suonda la maxima: narrativ – flexibel – actual.

2017 vegnan instradadas mesiras per adattar e optimar il program dal RR. Prioritat han en in'emprima fasa la moderaziun ed il sport regiu-nal sco er ils bulletins da novitad. Il process da meglierar il program dal RR cintinuescha.



Il viadi cintinuseha: Sco l'onn 2001, a chaschun da la turnea cun la VR tras il Grischun, tschertga RTR adina puspè il contact direct cun ses public. Da sanestra: Bernard Bearth, Agi Fetz, Isabella Wieland, Isabelle Jaeger, Erwin Ardüser.

RTR mia playlist: scolars fan il program da musica

Il december èn scolaras e scolars responsabels durant in'ura l'emna per il program da musica dal Radio Rumantsch (RR).

(ft) Els fan la selecziun da la musica che vegn emessa mintgamai il ven-derdi tranter las 7:00 e las 8:00. Per che quai funcziunia, tscherna la classa sia musica preferida. La redacziun da musica da RTR plazze-scha lura quella playlist enstagl dal program da radio ordinari. Uschia po quai capitär bain ch'ins auda las Liricas Analas, AC/DC ubain in titel actual da la parada da hits ch'ins n'auda uschiglio betg la bun'ura en

il program dal RR. Las classas che sustegnan la redacziun da musica il december èn da las scolas superiu-ras da Casti, da Favugn, da Laax e da Zuoz. Lur musica resuna ils 1, 8, 15 e 22 da december sin las undas rumantschas. E sche Vus avais mir-veglias tge chaus che han fatg quel-las playlists: ils scolars sa pre-schentan gist sezs en in curt video. Da vesair sin rtr.ch.



La seconda secundara da la scolaviva Laax ha fatg il program da musica dal RR da venderdi, ils 15 da december 2017, a partir da las set la bun'ura.

Tge munta «No-Billag» per il Grischun?

L'iniziativa che vul abolir las taxas da radio e televisiun ed uschia er la finanziaziun publica da medias è omnipreschenta. In gea a quest'iniziativa muntass la fin per la SRG SSR ed uschia er la fin per RTR.

(srg.r) Tge rolla ha la societad purtadra SRG SSR Svizra Rumantscha (SRG.R) en quest connex? Oscar Knapp, il president da la SRG.R e Gion Lechmann, commember da suprastanza SRG.R e manader da la gruppera «SRG.R Avegnir», decleran.



Oscar Knapp, tge finamira ha la SRG.R?

L'intent principal da la SRG.R è da francar l'interpresa SRG SSR – ed uschia er RTR – en la societad da la Svizra Rumantscha. Nus avain passa 1'000 commembra e commembra che s'interessan activamain per noss intent. L'attatga radicala da l'iniziativa «No Billag» ans intimescha dad infumar il public tge che fissan las consequenzas da l'aboliziun da las taxas da radio e televisiun.

Tgeninas fissan las consequenzas per radio e televisiun en il Grischun, sche

la populaziun da la Svizra decidess ils 4 da mars per in gea a l'iniziativa, e quant ferm fiss RTR pertutgada?

En il Grischun na dessi nagins emetturs da radio e televisiun pli. Emisiuns regiunalas da televisiun sco Telesguard, Cuntrasts u Minisguard svanissen. Ils emetturs da la SRG SSR èn finanziads cun 75%, ils emetturs da televisiun privats cun 70% ed ils radios privats cun enfin 50% tras la taxa da radio e televisiun. En il Grischun na profitan pia betg mo RTR, RSI u il Regionaljournal Graubünden da la taxa, mabain er Radio e TV Südostschweiz.

Ultra da quai avess in gea a «No Billag» consequenzas per persunas cun impediments dals senns. Il moment han ca 50% da la purschida audiovisuala da la SRG SSR suttitels.

Betg d'emblidar è er la scena da musica en il Grischun. RTR emetta mintga di radund 30% musica indigena e quai na cumpiglia betg mo chorus e musicas. Cun ses Top-pop rumantsch promova RTR surtut er chantaduras e chantadurs giuvens. E last but not least patiss er la scena da film. La SRG SSR sustegn mintg'onn co-producziuns da film en tut las quatter linguas da la Svizra – en il Grischun èn quai 4-6 films ad onn da producents independents – cun 40 milliuns francs..

Sche l'iniziativa vegniss acceptada fiss la SRG SSR pertutgada en sia existenza! A partir dal prim da schanner 2019 n'avess ella naginas entadas da taxas pli. Ella na pudess betg pli finanziar RTR e la consequenza fiss clera: elavurar in plan social e «stizzar las glischs». In plan B na datti betg.

Nagin plan B – è quai strategia, u è quai propri uschia?

Quai è propri uschia: Nagin plan B. Las taxas muntan a ca $\frac{3}{4}$ da las entradas da la SRG SSR. L'ultim $\frac{1}{4}$ èn entradas da publicidad – questas sa diminuissen fitg svelt er sin nulla causa da la nunattractivitat dal program che n'existiss praticamain betg pli. In «plan B» han forsa ils adherents da l'iniziativa che vulan privatizar l'infurmaziun dal nievel.



Gion Lechmann, la societad purtadra ha furmà la gruppera «SRG.R Avegnir» la quala vus presidiais. Tge fa questa gruppera precis?

La gruppera «SRG.R Avegnir» sa cumpona da commembra e commembra dals gremis da la SRG.R. Nus vulain mussar tge che RTR e la SRG

SSR prestan e tge che nus perdesan, sch'i na dess betg pli la SRG SSR ed uschia er betg pli RTR.

Cunquai che collavuraturas e collavuraturas dad RTR na dastgan betg s'engaschar publicamain cunter l'iniziativa «No Billag», èsi fitg important ed era in'obligaziun da l'unun purtadra SRG.R da s'engaschar cun tutta forza per RTR e per la SRG SSR ed uschia cumbatter l'iniziativa «No Billag».

Independentamain da las activitads da la SRG.R è sa furmà en il Grischun il comité politic «NA a No-Billag – Na ad in Grischun senza vusch». Dapli da quest comité sin www.nein-no-billag-gr.ch.

Tge acziuns concretas èn planidas?

La gruppera «SRG.R Avegnir» dispona da differents ressorts che cumbatten l'iniziativa «No Billag». Planidas èn acziuns ed occurrenzas pubblicas d'infurmaziun e da sensibilisaziun en las regiuns, in fundraising entaifer l'unun SRG.R, occurrenzas en collavuraziun cun ulteriuras uniuns e gruppaziuns che sostegnan nossas finamiras sco era brevs da lecturAs ed ina vasta preschientscha en las raits socialas. Per l'organisaziun d'occurrenzas è era previsa ina stretga collavuraziun cun la Lia Rumantscha.

Per dumondas stattan gugent a disposiziun Oscar Knapp, president SRG.R, e Gion Lechmann, manader da la gruppera «SRG.R Avegnir»: avegnir@srgsr.ch

**DAVENTAI COMMEMBRA
DA LA SRG.R**

Contribuziun annuala:
CHF 20.– per persunas singulas
CHF 30.– per uniuns
CHF 80.– per persunas giuridicas

Dapli sut srgsr.ch

La bova da Bondo – RTR ha mussà in engaschi extraordinari

En l'ultima seduta da l'onn 2017 ha il Cusseggl dal public SRG.R analisà las reportaschas da la bova da Bondo, il project HelveCHia ed ils videos da novitads online. Il resultat da l'analisa: las reportaschas da Bondo èn reussidas, HelveCHia pudess sa fatschentar cun tematicas anc pli relevantes, e laud per ils videos online.

Gist la situazion nunusitada en la Bregaglia ha pretendì da las redacziuns involvidas d'ina vart in engaschi nunstanclentaivel durant di e notg e da l'autra vart fins sensoris ed empatia. Star en il lieu da catastrofa, esser in tant pertutgà e tuttina rapportar a moda objectiva e fundada è ina sfida betg quotidiana ch'è – tenor il Cusseggl dal public SRG.R – reussida a RTR. Ils traïs vecturs radio, televisiun ed online han rapportà a moda actuala, detaigliada ed autentica. Il public ha adina pudì far in maletg cumplet da quai che curra e passa al lieu da catastrofa.

HelveCHia

Ina giada l'emna rapporta HelveCHia a moda equilibrada da las ulteriuras parts da la Svizra. Questas reportaschas èn da chattar sin rtr.ch. Il Cusseggl dal public SRG.R remartga che questa purschida è anc pauc enconuschenta al public. La schelta e variazion dals temas na persvada betg adina, i manca qua e là la relevanza. La qualitat ed il cuntegn satisfan dentant per gronda part. Grond laud retschaiva la pagina d'internet da HelveCHia. La charta geografica interactiva dat ina stupenta survista e gida a chattar las contribuziuns tenor regiun.



Ils 22 da november è il Cusseggl dal public SRG.R, che vegn presidià da Roger Tuor da Mustér (sin la foto a sanestra), sa radunà a sia ultima seduta da l'onn.

Il Cusseggl dal public SRG.R

Il CDP SRG.R è in gremi consultativ independent che accumpogna la lavur ed il svilup dal program da RTR cun constataziuns e propostas. Il Cusseggl dal public SRG.R sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il Cusseggl dal public SRG.R procura per in streng contact tranter ils responsabels dal program ed il public. El

sa cumpona dals suandants com-members: Roger Tuor (president), Carmen Dedual (vicepresidenta ed actuara), Lucrezia Berther, Selina Caduff, Pascal Gian Caminada, Giancarlo Conrad, Ursin Defuns, Ursina Haller, Alexi Nay, Claudia Nicolay-Nuotclà, Ursina Schmed-Cathomas, Gianna Valeuria Sonder, Curdin Tuor, Adrian Vileta.

Videos da novitads online

Videos da novitads online remplazzan pli e pli fitg las novitads usitadas cun text e fotografia sin ils portals electronics da las medias. Quai trend pon ins percorscher era tar RTR. Las contribuziuns digitalas producidas a moda professiunala rapportan en furma curta e compacta davart il pli necessari ed impurtant. Il layout unitar gida il public da sa sentir da chasa. La qualitat, en spezial las visualisaziuns, chattan grond laud tar il Cusseggl dal public SRG.R. Ils texts accumpagnants en ils videos augmentan la chapientscha e correspundan a la nova moda e maniera d'infurmare e

da divertir, spezialmain en las raits socialas. RTR va cun il temp e dat senza difficultads dumogn a questa sfida actuala da la digitalisaziun.

In sguard en il futur

Enfin la proxima seduta dals 21 da favrer 2018 prenda il Cusseggl dal public SRG.R sut la marella la qualitat dal linguatg pledà e scrit da RTR. Ina terza gruppera vegn a sa fatschentar cun las emissiuns realisadas da tuttas unitads d'interpresa da la SSR en connex cun il «Di dal clima» dals 29 da november 2017.

Roger Tuor, president
dal Cusseggl dal public SRG.R

CONCERT SIN GIAVISCH

MINTGA DUMENGIA A LAS 11:00

SRG SSR**Svizra Rumantscha**

La SRG.R tschertga in A novA presidentA

La perioda d'uffizi dal president actual da la SRG SSR Svizra Rumantscha (SRG.R), Oscar Knapp, va a fin la fin dal 2018. L'elecziun da sia successura/da ses successor ha lieu a chaschun da la radunanza generala dals 26 da matg 2018 a Landquart. Elegibels èn commembras e commembers da la SRG.R cun domicil en Svizra (art. 23 dals statuts).

Interessentas u interessents per il post da presidenta/president SRG.R pon s'annunziar tar il president actual oscar.knapp@rtr.ch.

Tschintg dumondas a Katharina Fallet-Grond (80), Müstair

Commembras e commembers da la SRG.R vegnan a pled

Katharina Falett-Grond, pertge essas Vus commembra da la SRG.R?

Jau hai adina persequità cun interess tge che capita cun noss rumantsch. Ed ussa ch'el è bain preschent en las medias, è er il sustegn finanzial fitg impur-tant. Perquai sun jau commembra da la SRG.R.

Tge spetgais Vus da la SRG.R?
Gist en vista a las discussiuns davart l'iniziativa «No Billag» èsi impurtant che RTR survegnia sustegn da tuttas varts, era da la SRG.R.



Katharina Fallet-Grond da Müstair, anteriura hoteliera e catecheta – oz pensiunada fortunada.

Tgeninas èn Vossas emissiuns preferidas da RTR?

Las emissiuns che jau guard il pli savens èn il Telesguard ed ils Cuntrasts.

Sco anteriura catecheta e collavuratura da pravenda e plaiv, è era l'emissiun Vita e cretta dal Radio Rumantsch fitg impur-tanta per mai. Gist oz che la di-versitat en cardientscha e baselia vegn adina pli vasta e cumplitgada è il pled da la du-mengia en l'emissiun Vita e cretta da gronda pertada per mintga cristian.

Tras las emissiuns da RTR hai jau perfin emprendì plaun plau-net in zic rumantsch grischun,

però na vuless jau betg renun-ziar als divers idioms!

Giavischs, critica e laud per RTR

La moda e maniera fitg simpa-tica dals reporters e modera-turs plascha fitg bain a mai, «impustüt er cur ch'i vegn tave-là sco cha'l piccel es creschü».

Tge impurtanza ha per Vus la lingua rumantscha?

Noss rumantsch, per mai il jauer, è e resta mia lingua ma-terna ed jau sper ch'ella survi-via generaziuns: tgi che sa ru-mantsch sa dapli!



REMAS – era cun sustegn da RTR



Era il 2017 ha RTR pudì sustegnair intginas registraziuns da musica e projects da portatuns. In da quels è era stà il project REMAS da Mario Pacchioli che ha mess en musica 18 poesias rumantschas per chant ed orchester sinfonic. Sias cumposiziuns èn influenzadas da la chanson franzosa e da la canzone taliana e dattan in nov vestgi a las poesias rumantschas. Ussa è cumparì il disc cumpact, ensemen cun in cudesch ch'inclusa las poesias en la versiun originala rumantscha ed en la translaziun tudestga e franzosa.

Charas commembra, chars commembra da la SRG.R

Il temp d'advent n'è per mes collegas tar RTR ed en l'entira SSR betg uschè festiv e contemplativ sco auters onns. La votaziun «No Billag» dals 4 da mars è gja dapi mais in tema intensiv. La consequenza d'in «gea» a l'urna fiss ina Svizra senza medias publicas ed independentas, in Grischun senza las vuschs regionalas da radio e televisiun en tut las trais parts linguisticas ed ina Rumantschia senza programs rumantschs da radio, televisiun ed online. La SRG.R s'engascha fermamain per in «na» ils 4 da mars. Quel sustegn da nossa sociedad pertadra sentin nus tar RTR – e quel motivescha nus!

Perquai vuless jau dir da cor: grazia fitg per tut quai che vus avais fatg e per tut quai che vegn anc realisà en l'avegnir. Nus vulain esser e restar vossa chasa da medias cun tut quai che tutga tiers: emissiuns, infurmaziuns, gratulaziuns ed emoziuns.

Ladina Heimgartner



SRG.R
p. m. da sias 1'029
commembra, chara
commembra